



Publicaziuns dalla vischnaunca, jamna 4

Damondas da baghegiar

2024-1002.000

Datum dalla publicaziun: 26 da schaner 2024

Ilis patruns: Clemens e Claudia Berther-Bearth Via Salez 3, 7186 Segnas
Representanza: Atelier Schmidt GmbH, Via Fabrica Caum postal 147, 7166 Trun
Intenziun: Sanaziun parziala dalla habitaziun sura e dils dus balcuns
Edifeci nr.: 392A
Parcella: 125
Adressa: Via Salez 3, 7186 Segnas
Zona: Zona dil vitg engrondida (VE)
Zona da prighel: Negina

Plan general da formaziun: Ulteriurs baghetgs cun prescripziuns da protecziun

2024-1001.000

Datum dalla publicaziun: 26 da schaner 2024

Patruns: Eva-Katharina e Marco Tomaschett, Via Plaun-Sut 15 7180 Disentis/Mustér
Representant: Marco Tomaschett, Via Plaun-Sut 15 7180 Disentis/Mustér
Intenziun: Engrondaziun dalla surfatscha da habitar e sanaziun digl edifeci
Edifeci nr.: 658
Parcella: 2911
Adressa: Via Run Foppa 2, 7180 Disentis/Mustér
Zona: Zona agricola
Zona da prighel: Zona da prighel 2 (blaua)

Protestas:

Ilis plans da construcziun ein deponi tier l'administraziun communal. L'investa publica cuoza 20 dis dapi il datum dalla publicaziun. Eventualas protestas encunter sura damonda da baghegiar ein d'inoltrar a scret enteifer 20 dis all'instanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Uffeci da baghegiar Disentis/Mustér



Cussegl da vischnaunca
Rapport dalla seduta dils 23 da schaner 2024

Mardis, ils 23 da schaner 2024 ha giu liug el Center Fontauna la 28avla seduta dil cussegl da vischnaunca dalla perioda d'uffeci 2021/2024. El center dalla seduta ei stau in credit pil concept da molocs per la vischnaunca da Mustér. Il cussegl da vischnaunca ha concediu unanimamein il credit da frs. 275'000.– per la realisaziun dil concept ed approbau la revisiun parziala dil plan da zonas e dil plan general da formaziun per «l'explotaziun da crappa Ragisch/Mumpé Medel». Sco niev dumbravuschs pigl onn 2024 ei Remo Huonder vegnius eligius.

Sut l'egida dil **president dil cussegl da vischnaunca Ignaz Venzin** ei vegniu concediu mardis sera in credit ell'altezia da frs. 275'000.– per la realisaziun dil concept da molocs ella vischnaunca da Mustér. Cun l'entschatta digl onn 2023 ein la nova lescha ed il regulativ da taxas davart l'economisaziun dils rufids i en vigur. A caschun d'ina fasa da test da rimnar il rumien mo inagada ad jamna il davos da november entochen meiez december 2023 ei resultau ch'ei fuss pusseivel da rimnar il rumien mo pli inagada ad jamna e cheutras reducir marcantamein ils cuosts dallas taxas fundamentalas. Per saver contonscher quella finamira ha stuiu vegnir elaborau in concept da molocs. Quel preveda da tschentar ni remplazzar rodund 30 molocs. Per realisar il concept da molocs ha il cussegl da vischnaunca concediu ier sera unanimamein in credit ell'altezia da frs. 275'000.–. Per in'emprema etappa ei gia stau reservau ina summa el preventiv 2023 e vegniu concediu credits supplementars. Cun la realisaziun dil concept sa vegnir purschiu el futur ina bun'economisaziun dils rufids cun adattar la rimnada regiunala ad ina gada per jamna.

Plinavon ha il cussegl da vischnaunca approbau la revisiun parziala dil plan da zonas ed il plan general da formaziun per l'explotaziun da crappa a Ragisch/Mumpé Medel. Quella decisiun vegn el senn digl art. 11 al. 1 dalla lescha da baghegiar aunc suttamessa ils 3 da mars 2023 alla cuminonza da votantas e votants.

Ulteriuramein ha il cussegl da vischnaunca suenter entgina discussiun renviu cun 6 encunter 4 vuschs e duas abstenziuns la proposta dalla suprastonza communal da revegnir al conclus dils 22 da zercladur 2022 e desister el cass dalla realisaziun dalla cuvrida fina dalla Via Raveras d'ina procedura da contribuziun.

Suprastonza communal

Referendum facultativ

A caschun da sia seduta dils 23 da schaner 2024 ha il cussegl da vischnaunca approbau unanimamein in credit da frs. 275'000.– per la realisaziun dil concept da molocs enteifer igl empren quartal 2024.

Conform ad art. 21 lit. c dalla constituziun communal ei quella decisiun suttamessa al referendum facultativ. Il messadi davart quella fatschenta ei exponius per investa en casa communal (stanza nr. 10). Enteifer 20 dis dapi la publicaziun officiala han 80 votants la pusseivladad d'inoltrar enviers sura conclus il referendum e pretender ina votaziun dil pievel.

Suprastonza communal



Taglia da tgauns 2024

Tenor artechel 7 dalla lescha communal da taglia ei mintga persuna che tegn in tgaun sil territori dalla vischnaunca da Mustér obligada da pagar ina taglia da tgauns. Ulteriur da quei sto il tgaun esser marcaus cun in microchip.

Ils possessurs da tgauns retscheivan directamein in quen per la taglia da tgauns. Quella munta pigl'emprems tgaun frs. 120.00 e per mintga ulteriur tgaun ella medema casada frs. 180.00 per onn. Tgauns da polizia, tgauns da schurmetg, tgauns da lavinas sco era tgauns per tschocs e suords ein deliberai dalla taxa.

Adatg!

Possessurs ch'acquistan da niev in tgaun ein vinavon obligai da vegnir enteifer 30 dis persunalmein al spurtegl dall'administraziun communal per cumprovar la registraziun dil microchip. Il conto sin la plattafurma da datas Amicus vegn endrizzaus entras l'administraziun communal. Mintga possessur d'in tgaun ei obligaus da registrar acquists, surdadas, mortoris ed exports egl'exteriur d'in tgaun. Administraziun communal

Alarm d'emprova 2024

Tenor communicaziun digl'Uffeci da militar e da protecziun civila dil Grischun ha liug en l'entira Svizra

mesjamna, ils 7 da fevrer 2024,
– **allas 13.30/13.45 alarm general**
– **allas 14.15/15.00 alarm d'aua**

Ei setracta d'alarms d'emprova tier ils quals ei vegn examinau d'ina vart sche las sirenas funcziuneschan e da l'autra vart vegn dau la pusseivladad d'emprender d'enconuscher ils differents tuns d'alarm.

Alarm general

Cun quei alarm vegn la populaziun alarmada en cass da prighel smanatschont. Il signal «alarm general» ha in tun che crescha e sbassa e che cuoza ina minuta. Aschinavon ch'il signal «alarm general» avisescha **ordeifer igl alarm d'emprova**, lu significhescha quei ch'ina periclitaziun dalla populaziun ei pusseivla. En quei cass vegn supplicau la populaziun da tedlar radio, da suandar las ordinaziuns dallas autoritads e d'informar ils vischins.

Alarm d'aua

Igl alarm d'aua vegn menaus atras allas 14.15 ed allas 15.00. In tun bass da mintgamai 20 secundas en intervals da 10 secundas.

Aschinavon ch'il signal «alarm d'aua» avisescha **ordeifer igl alarm d'emprova**, lu significhescha quei ch'ina periclitaziun dalla populaziun ei pusseivla. En quei cass vegn supplicau da bandunar immediat il territori periclitau. Dils plans cul territori periclitau sa vegnir priu investa tier l'administraziun communal.

Ulteriuras indicaziuns e reglas ein d'anflar sin teletext, pagina 680 ed era egl'internet www.sirenentest.ch.

Bien engraziament per Vossa capientscha.

Suprastonza communal Disentis/Mustér



Controlla da habitonts

Naschientscha

Melina Fry, naschida ils 15 da schaner 2024, feglia dad Andrea e Fabian Fry

Mortori

Tresa Flepp-Venzin, naschida ils 16 da settember 1932, morta ils 19 da schaner 2024

Administraziun communal Disentis/Mustér

Biblioteca populara Disentis/Mustér e contuorn

Mesjamna, ils 7 da fevrer 2024 allas 19.30 envida la biblioteca alla prelecziun dil cudisch Pissiuns – revista d'in muntagnard cun igl autur Felici Schuoler e la lectora Lisa Schmid-Candinas. Suenter la presentaziun envida il team dalla biblioteca ad in pign apero.

Entrada libra.

Nus selegrein sin Vossa viseta.

Il team dalla biblioteca

Corporaziun da dretgs d'alp Nalps e Tegia miez

Radunonza generala, gliendisdis, ils 5 da fevrer 2024 allas 20.00 ell'Ustria Cresta Segnas.

Tractandas ordinarias supplementar:

5. informaziun e decisiun pertuccont convegnentscha cun Nalps Solar AG
6. Alp da nuorsas Nalps, informaziun e decisiun

L'investa els novs contracts sa vegni priu ordavon tier il president Armin Berther, 079 609 48 25. Suenter la raduonza dat ei in sempel pushegn.

Cordialmein envida

la suprastonza

Uniun da scursalar e spassegiar Mumpé Medel

16avla cuorsa da scarsola e sliusa da corns a Mumpé Medel

Dumengia, ils 28 da schaner 2024 organischescha l'Uniun da scursalar e spassegiar Mumpé Medel suenter ina pausa sfurzada da 4 onns puspei l'usitada cuorsa da scarsola e sliusa da corns. In e scadin ei envidaus seigi quei sco participont ni visitader. L'ustria sil plaz porscha naven dallas 9.30 – 19.00 sper in bien caffè era ina buna suppa da giutta, grilladas ni in gustus toc petta ni tuorta.

Tuttas informaziuns anfleis Vus sut: la-scursalada.jimdofree.com/romontsch/occurrenzas

Nus selegrein sche Vus passenteis quei di cun nus a Mumpé Medel.



Sentupada cun affons pigns e geniturs

Nus envidein cordialmein tut ils affons entochen treis onns (cun fargliuns e geniturs) da s'entupar, termagliar e paterlar.

Proxima sentupada mesjamna, ils 31 da schaner 2024 allas 9:30-11:00 en casa da scola Segnas, local artgin, ella 1. alzada. Prender cun marena e scalfins.

Cordialmein envida

Uniun da dunnas, ressort affons

Apparats d'udida

Gliendisdis, ils 5 da fevrer 2024 saveis Vus schar schubergiar e rugalar Vies apparat d'udida:

9.15–10.30 en Casa sogn Martin a Trun

11.00–11.45 en Casa sogn Giusep a Cumpadials

13.15–14.30 el PUNTREIS, Center da sanadad a Mustér

Dunna Giger dalla firma Amplifon AG e signur Gfeller dalla firma Jäggi Optik & Hörberatung AG sorprendan comunablamein quei survetsch gratuit per tuts interessents.

Ei drova negina annunzia.
